

•Fwendoxlienh•

Gaem Fwngz Daengz Gyaeuj Hau

□ Yiz Ciz / 余 执



Bouxsai rog daek raemx,
Vah ciuq mbouj ciuq saem(sim),
Raeuz gaem fwngz dawzdingh.

Sai:
Ngoenz fwn doek byajraez,
Gou cungj ngeix mwngz gvai,
Gou maij mwngz dahraix,
Ndiep daengz dai mbouj cuengq.

Mbwk:
Ngoenz fwn doek byaj raez,
Gou caen ngeix dahraix,
Roen gyae gou cungj byaij,
Ndiep dai mwngz mbouj rox.

Sai:
Ngeix daengz mwngz lauxbiuj,
Sim gou diuqlinlin,
Ngeix mwngz youq ndawsim,
Hwnz mbouj ninz hix nyienh.

Mbwk:
Ngeix daengz mwngz lauxbiuj,
Sim diuq lumj byajraez,
Roen caiq gyae cix gae,
Cungj aeu bae guhdoih.

Haj ,Dingheingz
Mbwk:
Sambek caeuq Yinghdaiz,
Dai bae lij doxgoq,
Ngeix song raeuz ndaw hoz,
Rox ngoenzcog yienghlawz.

Sai:
Sambek caeuq Yinghdaiz,
Dai lij ndaej caemh moh,
Gou gangj naeuz ndaej goq,
Mbouj dwg lox mwngz nuengx.

Mbwk:
Gou ndiep mwngz lailai,
Ndiep dai mwngz mbouj rox,
Gou ndiep haemz ndiep hoj,
Ndiep gvaq ngaenz coq daeh.

Sai:
Gou ndiep mwngz lailai,
Ngaiz mbouj gwn hix imq,
Gou ndiep mwngz ringring,
Ce mingh hawj mwngz dawz.

Mbwk:
Raeuz gangj ndaej doxdeng,
Gaem gen bae gezvwnh,
Naeuz lajdeih gwnzmbwn,
Raeuz dwg vunz ranz dog.

Sai:
Ndaej coenz vah nuengx neix,
Fanhseiq mbouj ce mwngz,
Caiq geq gaem faex dwngx,
Gaem fwngz daengz gyaeuj hau.

Mbwk:
Seiz cibngeih diemj lai,
Wnggai hab bae ninz,
Byaifwj yaek hau nding,
Bae ninz lo youxnoix.

Sai:
Bae ranz lo duz a,
Maranz lo lauxbiuj,
Vah raeuz gangj mbouj liux,
Iu ngoenzcog caiq raen.

*Aeu yawj: Gij cih “gim” 、
“ngaenz” 、 “doq” 、 “gvai” ndaw fwen
dwg heuh bouxyoux.*

It ,Doxdongx
Mbwk:
Youq ranz sim mbouj caih,
Ok baihrog daeuj youz,
Youq ranz gyaeuj ngunhgouz,
Okdaeuj youz siu heiq.

Sai:
Haemhneix ronghndwen ndei,
Fwj dazsei hwnj moq,
Gyangdien rumzliengz boq,
Hai hoz daeuj fwenlangh.

Mbwk:
Haemhneix haemh gijmaz,
Roeg byaibya mbouj heuh,
Vameiz caeuq roeggeuq,
Mbouj nyi heuh saek duz.

Sai:
Youq ranz la youxdoq,
Ok lajroq daeuj caemz,
Youq ranz la youxngaenz,
Ok haenz daemz daeuj liuh.

Mbwk:
Haemhneix haemh gijmaz,
Roeg byaibya hai sing,
Coenzcoenz gyukringring,
Caen ndeidingq dahraix.

Sai:
Duzbitboh hai sing,
Mbouj ning lumj vameiz,
Sing fwen gou mbouj ndei,
Heiq(lau) vunz dawz bae lwnh.

Mbwk:
Mwngz fwen baenzlai gyuk,
Bouxnuk hix ndaejnyi,
Fwen mwngz baenzlai ndi(ndei),
Dwk vunz fiz liuxnauq.

Sai:
Gou eufwen mbouj ndei,
Gaej gangj yienghneix vah,
Sing fwen baenzlai ca,
Mbouj miz naj doiq vunz.

Mbwk:
Lauxbiuj vaiq okdaeuj,
Raeuz doxcaez raennaj,
Sing fwen gyukcaca,
Gangj vah byonj dwk raeuz.

Sai:
Danghnaeuz nuengx mbouj yiemz,
Gou cienq naj gvaqbae,
Danghnaeuz nuengx raen ndei,
Raeuz doengzcaez doiq fwen.

Mbwk:
Sing fwen beix baenz ndei,
Gaej yienghneix doeknaiq,
Fwen baenzneix leixhaih,
Gou maij gaen mwngz hag.

Sai:
Gaej gangj yienghneix gvai,
Gaej nai yienghneix vah,
Gou fwen baenzlai ca,
Bouxlawz ra daengz raeuz.

Mbwk:
Lauxbiuj dangq bouxdaeuz,
Mbouj naeuz gou cix rox,
Raen sing fwen gou yoq,
Cij gyoj yienghneix vah.

Ngeih ,Raennaj

Sai:
Va a va,
Youq gungx caz hau maeq,
Fwngz iu iu mbouj ndaej,
Faex fad fad mbouj daengz.

Mbwk:
Dwgcoh duj vavengj,
Youq daegdengj gwnz go,
Gadog maj gwnz bo,
Bouxlawz goq daengz raeuz.

Sai:
Ndaejnyi nuengx hai sing,
Sim gou mbin lumj mbaj,
Ciuqmienh daeuj raennaj,
Lumj duj va sam nyied.

Mbwk:
Gyae ’gyae ndaejnyi sing,
Sim gou mbin lumj yiuh,
Gou raen daengz lauxbiuj,
Sim diuq lumj max lamh.

Sai:
Vamaenj hau youh hau,
Vadauz maeq youh maeq,
Maeq mbouj gvaq vadauz,
Hau mbouj gvaq youxnoix.

Mbwk:
Coenz fwen geij coenz doq,
Mwngz rox gyoj baenzndei,
Caeuq mwngz doiq fwen geiq,
Sim gou maezriegrieg.

Sai:
Gou fwen mbouj miz lai,
Nai coenzcoenz mbouj rox,
Raen daengz mwngz le doq,
Angqfofo gvaq ngoenz.

Mbwk:
Gou vunz siengq mbouj ndei,
Aen rei hwnj comz da,
Bak mbouj rox gangj vah,
Ga mbouj rox byaij roen.

Sai:
Mwngz gangj vah yienghneix,
Gou caen ngeix lailai,
Lau mwngz sim mbouj maij,
Cij nai sam nai seiq.

Sam ,Dajdamq

Sai:
Guhdoih youq lajmbwn,
Guhdoih ndwn laj liengj,
Gou siengj mwngz mbouj siengj,
Vaih bae mbiengj simdaeuz.

Mbwk:
Yienghneix fwen aujauj,
Lau yah mwngz ndaejnyi,
Gou nienzgeij lij iq,
Mbouj miz damj raen vunz.

Sai:
Yah mbouj miz gwnz ranz,
Fanz sim mwngz mbouj rox,
Caeuq mwngz caemh heuh boh,
Rox mwngz nyienh mbouj nyienh.

Mbwk:
Mwngz miz yah liux gim,
Ndaej cingj mbouj ndaej riengz,
Yah mwngz sau oengiengj,
Gou riengz mwngz vaih ciuh.

Sai:

Yah caengz miz lo gim,
Sim gou ngeix mwngz doq,
Gou ndiep mwngz ndaw hoz,
Mwngz mbouj rox daengz gou.

Mbwk:
Sou gvanbaz doxndiep,
Gang riep guhdoih ninz,
Sou gvanbaz caemh sim,
Swiq din raemx doxgonh.

Sai:
Yah mbouj miz caen ndaenq,
Ngaenz gaej gangj yiengh vah,
Nuengx mwngz raen gou vaj,
Gij maz vah cungj miz.

Mbwk:
Naemj caeuq gou ganggijoj,
Go miz maz bonjsaeh,
Ciengx bit rox ciengx gaeq,
Cij ndaej baenzlai gvengx.

Sai:
Gou mbouj dwg ciengx gaeq,
Hix mbouj ndaej ciengx mou,
Ndaem mak song cien moux,
Souhaeuj mbouj suenq lai.

Mbwk:
Mwngz ndaem mak baenzlai,
Gai bae couh ndaej ngaenz,
Lwgsau baez yawjraen,
Bouxboux naemj gaenriengz.

Sai:
Lwgsau gou mbouj maij,
Cij aiq(ndiep) mwngz boux neix,
Mwngz vunz gyaeu sim ndei,
Gou ngeix mwngz daengx ciuh.

Mbwk:
Gangj caen rox gangj gyaj,
Duzbyaj youq gwnz raen,
Miz buenq gangj naeuz gaen,
Lau mwngz faen mbouj cingh.

Sai:
Caen mbouj ndaej guh gyaj,
Sa suek mbouj ndaej feiz,
Gou ngoenz ngeix hwnz ngeix,
Ndaej mwngz sim cij net.

Seiq ,Doxmieng
Mbwk:
Vah mwngz gangj baenz ndei,
Ngeix daengz gou sim baih,
Ndaej caeuq mwngz doxmaij,
Cien daih cungj vuenyungz.

Sai:
Ndaej aeu mwngz guh yah,
Gwn raemxdah hix van,
Ndaej caeuq mwngz caemh ranz,
Byaek ndaw banz did nyod.

Mbwk:
Mwngz beix caen ndaej aeu,
Raeuz doxnaeuz guhhong,
Noh mbouj miz roengz congz,
Cungj mbouj gongz coenz vah.

Sai:
Cij aeu nuengx ndaej daeuj,
Duzmou gou hix gai,
Nuengx ndaej daeuj dahraix,
Guh cai gingq diendeih.

Mbwk:
Mehmbwk dingfaz dok,